

Por lo menos 63 morto den inundacionnan devastador na Spaña

(AP) - Por lo menos 63 hende a muri den este di Spaña despues cu inundacionnan repentino a lastra autonan, a converti cayanan di ciudad den riu y a corta liñanan di ferry y careteranan, den e pio desaster natural cu a asota e nacion Europeo recientemente.

Servicio di emergencia den e region oriental di e Comunidad Valenciano a confirma un cantidad di morto di 62 te ayera diaranson. Oficina di gobierno central pa e region di Castilla La Mancha a agrega cu un muhe di 88 aña di edad a ser haya morto den e ciudad di Cuenca.

E tormentanan di diamars a causa inundacion den un area amplio di sur y este di Spaña, for di Malaga te Valencia. Awa colo di lodo a lastra vehiculonan riba caya na velocidadnan peligroso.

Pida palo tabata bula memey di articulonan di cas. Polis y rescatistanan a usa helicopter pa evacua hende for di nan cas y tambe botonan pa yega na chauffeurnan pega riba dak di auto. Prome minister Spaño Pedro Sanchez a bisa cu decenas di pueblo a ser inunda.

“Na esnan cu na e ora aki ta sigui busca nan sernan keri, henter Spaña ta yora cu boso tur,” Sanchez a bisa den un discurso televisa. “Nos prioridad absoluto ta pa yuda boso. “Nos ta bay usa tur e medionan necesario awe y mañan, tanten cu ta tuma pa nos por recupera di e tragedia aki”.

Autoridadnan a raporta varios persona desaparecido diamars anochi, pero e siguiente mainta a trece e anuncio impactante cu a haya decenas di victima morto.



“Ayer tabata e pio dia di mi bida,” Ricardo Gabaldon, alcalde di Utiel, un ciudad na

Valencia, a bisa na stacion di television estatal RTVE. Varios persona ainda tabata perdi

den su pueblo, el a agrega. “Esaki tabata un desaster, autonan y container tabata pasa den caya. E awa a yega tres meter”, el a splica.

Mas di 1,000 soldad di Unidad di Emergencia Militar a ser desplega den e areanan devasta. Tambe a manda rescatista for di otro partinan di Spaña.

Gobierno central di Spaña a forma un comision di crisis

pa yuda coordina esfuerzonan di rescate.

Un pareha di edad a ser rescata for di e piso ariba di nan cas pa un unidad militar usando un chubato. Stacionnan di television a transmiti videonan graba pa residentenan spanta documentando con awa a inunda e pisonan mas abou di apartamentonan, riunan cu a desborda y por lo menos un brug cu a basha abou.



Ministerio di Cultura y Departamento di Cultura di Aruba a tuma nota di fayecimento di nos legandario musico, compositor y cantante di Aruba:



Boycy Jacobo Federico Croes

*10 di october 1931 - †06 di juni 2024

Miho conoci como: “Boysy”

Ministerio di Cultura y Departamento di Cultura Aruba ta expresa palabranan di condolencia y forsa na su Sra. Aura Clarita Lopez, su yiunan Arline, Clarine y demas famia y amistadnan.



Cu Boysy sosega na paz.

